

四庫全書

集部

欽定四庫全書

集部  
元音遺響卷三  
四

詳校官中書臣丁榮祚

助教臣常衡覆勘

總校官原任中允臣王燕緒

校對官中書臣孫球

謄錄監生臣李炎

欽定四庫全書

元音遺響卷三

元 胡布 撰

七言古詩

張子玄畫梅詩

為李允先生賦

清河之子鐵石腸寒玉為操冰為裳湘簾風靜小窗夜  
月澹梨雲飛夢長夢中彷彿孤山下西湖處士知我者  
弱水茫茫玉笛寒翠禽聲起鞦韆架碎冰和墨幻瑤真  
桃腮杏臉慚丰神一片江南秋水白天香亂撲羅浮春

有時半折臘脂顆酒暈衝寒晚香破有時斜抹縞衣籠  
絕似黃昏澹煙浣補之寫手近代奇清河獨師王會稽  
平生自得冰玉骨脫略毫素回天機閩南十九徵揮翰  
萬幅瑤花蒼鐵幹更須倍蕾待和羹千古圖酸表雄觀

蒙山春晚圖

為周清之賦

愛蓮先生孫子賢置郵三載來杭川輶車盈盈驛騎駛  
公館一飯無留延畫師乘閒拂毫素萬里蒙山生尺楮  
家鄰鄒魯邈歸途宦薄閩門澹遊趣故山春明萬景陰

青陽旭日開中林，泉分五乳石流淨。  
苔蝕璚崖甘露深，琳宮晶熒倚天表。  
絳樹微茫接空杳，東峯斜月照行人。  
北鄙蒼煙度歸鳥，圖中鄉國夢中詩。  
魏闕身心江海思，此日職司忠有在。  
他年丘壠考無違，我亦雍丘種瓜老。  
憂天之人共鄉堡，何時一曲望江南。  
同上蒙山拾瑤草

題方壺嶰谷朝陽

老壺心受李後王，筆力肩齊金少海。  
時於毫素灑清泠，幾葉瀟湘發天籟。  
玉鈎金錯勢不同，屈鐵盤薄驚神工。

干將錯莫閔秋影  
劒羽淅瀝吹霜風  
綠金莖上日杲杲  
甘露盈條翠香好  
掣黿東海筋幹存  
待鳳蒼梧繁實老  
餘梢裊裊千虹霓  
伶倫取韻成叅差  
鈞天九奏欲備薦  
韶濩雲英相倡隨  
養蒙濡澤空山道  
松古梅芳交逸操  
侵天蔽日會有時  
九夏炎威迹如掃  
壺子天機龍虎精  
虛心勁節邈生成  
隄靡煖暈瑤瑤色  
繭楮寒芒風雨聲  
置之高軒光雪野  
鳳唼蒼涼楚雲暮  
玉軸冷風莫卷舒  
鸞翎神米將飛鶩

老將歎

長風飛沙三萬里漠漠平原戰塵裏漢家諸將氣如雲  
萬騎飲馬天山水天山水深寒入骨首霜經霜吐花紫  
塞嶂綠雲玉堞長邊秋泣月金鉦起昔年從事將軍青  
寘顏山石曾刻名前年斬頭八九萬幕南始見無王庭  
奇材劍客爭交結王公貴人皆折節名譽起身刀劍中  
勲庸忽在王侯列幸逢聖治罷弓刀得免猶勝走狗勞  
不同曲逆遊雲夢錫壤分符表威重畫圖麟閣貌生時

裏屍馬革得全歸成功受祿榮廉退太平金玉寶者願  
間經五原獵禽獸信馬邊場剪楊柳黃沙帶水尚熏腥  
白骨如山半摧朽始慙富貴在一身萬死豈盡無辜人  
不惜萬死易一生猶希百世享尊榮死者一一富貴心  
當得瓦礫變黃金天地生金起爭戰世上黃金不願見

清明日作

黃雲滿江江樹紫碧草荒城繞流水平原歌哭雜悲驩  
幾處松楸裂新紙死者白骨委路歧生者不歸何處所



煙華澹澹鳥飛來野田無主生桑梓昔年大官厭梁肉  
攘攘僕妾衣紈綺尊酒須傾十家產槌楚見血漉膏髓  
東鄰無田坐凍餒百草糠粃盡竟死夫病在床子乞食  
鄉里紛紛說兵事西隣有田牛入官男女殷勤供耒耜  
微需不足來囹圄喘息奄奄面如鬼河西大家日求趁  
終歲無人應針指擔頭鰕菜徒紛紜辛苦得錢爭換米  
三邊百戰矢如雨十室八九驅瘟癘翁死垂頭尚顧子  
子死父母無全計吁嗟乎天胡不仁豈若假手塗生類

就使橫屍積山壘銅駝金谷皆荆杞周宣中興偉臣在  
枉死呻吟眷仁治偏裨戮力建武功上德有道存經緯  
小農食飽大農喜樂歲終身保妻子羈臣拭目瞻治平  
當使八表皇風被

贈龐將軍

龐將軍虬髯戟烈凌秋旻當關叱咤萬夫勇一語不合  
輕王臣去年謝事歸東海鶚冠縞衣佩蘭茝斛雷手語  
託素心轉關濩索通悲灑君不是賀懷智石槽鐵撥雲

雷氣又不是康崑崙激流鏦鏦金鐵渾玉盤驪珠千萬  
轉春冰百裂黃河奔高堂秋空夜氣昏中天月色爛若  
銀請君別按伊州調不作青衫灑淚人

殿前生桂樹

金花濕露浴青瑣玉宮繁手勻秋顆翠陰亂月散香塵  
十二闌干曉風過驚鳥起飛仙子殘舞鸞交枝涼葉翻  
銀縈玳瑁重羅被翠鏤搔頭綰鳳鬟鳳鬟羞花悼春  
遠欲倩春時花滿眼

金史卷之三  
卷三  
憂且吟

寸草熱火林可燃尺鐵鑿石山為穿快劍斫水徒勞割  
利口詆訐何用言人生所貴推時美萬語不矜一語喜  
武乙何尤死暴雷盜跖端居保遐紀衛鞅嘗陳帝王道  
直以霸術符君好向使相容客舍人詎知法令為強暴  
明君素矜賈誼才時將不偶反見灾當其魯鈍保年壽  
何物鵬鳥興悲哀黃河不異流清濁一入大海勝杯勺  
混混魚龍奮頭角跳蝦走蟹相參錯行者苦短論苦長

邪人邪正祥不祥縱能鞭石填滄海亦有愚公計太行  
楊妃春睡圖

蘭湯濕玉臘脂軟雲螺隨枕腮紅淺漁陽鼙鼓夢中驚  
不似三郎喚不醒亡國冶容留粉墨此夢至今醒未得

題方壺雲山蕭寺圖

山人行樂溪橋東翦帽衲子欣相逢相逢相攜成一笑  
老刹有路山南通山南青瓊十二峯雲嵐列綵蒼景重  
請君為我激長嘯萬木古壑號天風行雲躡屐度飛磴

龍光走潭碧珠粲雄山之神不敢呵物變金沙界長坂  
長坂迴塘紫篠林蒼蘗花香貝葉深歷歷晨鍾翠微出  
朝光斜切玉山岑一逕浮莎青錦織喬松偃羽寒蛟色  
金繩耿光搖佛日鐵鳳交簷威梵國世尊寥寥空殿秋  
龍象慘戚陰風颭山僧逢迎禮闊略遙指寶華當白樓  
白樓之西小有洞僧伽文釋三千衆瞿曇石上說根源  
旃檀閣裏叅疑夢山人瞑坐天雨飄醍醐味冷風煩消  
從此靜通成大徹迴頭世火謾焚燒出塵直出塵中幻

浪說三途起八難此軀此相即真空八難何曾有空幻  
畫裏寰區塵眼塵風雲色界幻天真壺仙為幻區中眼  
難幻區中眼外人

題朗吟飛過洞庭湖圖

純陽早得莊列術飄然凌空履芒忽岳陽樓觀千萬人  
望眼依微生恍惚此皆幻譎籠世目神觀一返如轉燭  
何風可乘虛可憑吹天地影掛粒粟當時寫圖局形肖  
詩以遣真傳者誚此人應與此樓齊不爾那容海門嘯

河山色界非道心回仙豈泥區中音為君擊節夢中曲  
八表無倪何處尋

道士魏晦初詩

混混鴻濛彈丸戲兆形分裂為天地厥初生人自二氣  
抱一吹萬莫品暈剛噓柔吸互成體誕靈為物昧常始  
至士返真宅無滓窮身所受復元理洞以明明削涯涘  
玄根灌溉達軒陛何以誠之心合意逍遙自然湛無際  
此與晦初非二義子其佩言味道味



聽箏堂送朱啓文歸虎林省親

秦人破瑟促瑤柱翻作清商去聲譜唳鶴羣高咽素雲  
雛鶯語滑烘春樹故家王謝挹風流罷笛徐將玉撥撈  
桓伊雙手金縢曲風繞鶻弦壁月秋欲鼓陽春和彌寡  
調高誰是知音者改撥驪歌慰壯遊白雲冉冉吳山下  
題方壺寄虞還淳金錯刀

老壺胸宇珠璣海散作文章敷五采筆端磊砢金錯刀  
點染風雲噫大塊瑤枝矯矯浴月明劒羽獵獵吹秋清

千年龍髯老不化幾葉鳳唳寒無聲金張華館苦欲置  
購以千金人莫貫殷勤寫寄虞仙家虛堂白日雷霆氣  
虞仙霞佩凌空翔挾之綃帛虎盤囊臨風莫展青瑤軸  
會化神龍去紫蒼

題方壺臨金顯宗金錯刀贈劉二紹

卯金飛書子壺子欲覓琅玕寫生紙壺子篋中金錯刀  
少海天機忍相遺拂開蜀昶古硬黃信筆揮搨騰干將  
虬枝獵獵閱秋影龍氣習習吹寒芒玉竿蒼涼屈鐵利

鈎距生風漲清泚上清宮裏狡獪成題以保成摹筆戲  
幽軒白石對此君勁節虛心為寫真仙翁帝子俱物化  
劒羽空餘鸞鳳文卯金珍襲置邃閣太乙青藜映鈇鉞  
披圖長嘯挹清芬天外冷風灑寥廓

題王子慶畫開元寺圖

呂蒙故宅清溪側山木林林峭空碧千秋化作梵王宮  
唐年錫以開元額門前喬柯鐵屈蟠階下流水龍遊盤  
坐開寶月擁金相梵徹雨花飄玉闌丹青傑出蒼山表

雲際高俯青空杪鴻漸遙分一掬泉獅峯不放千林曉  
松濤入夜亂溪聲燈鏡連宵助月明清淨域中觀小劫  
金銀色界照重城茲山未許他峰並古塔不讓閩南盛  
一原堂上演大乘玉璣東序超無證我來亭上尋紫芝  
名藍兩醉春風期見花解得西來意擊竹因聞向上機  
畫裏幻成塵境幻具眼良工心手粲卷圖長嘯激清風  
一色虛空覲神觀

背面鞦韆美人圖

妾夫二十顏如玉綺戶銀窻照華屋屋前桃李花錦團  
屋後鞦韆柳陰曲百尺筋竿駐綵旗同心寶帶挽朱絲  
高天下地鴛鴦結去月來風連理枝夫今不歸傷獨自  
翠被春深積殷漬熏香消盡曉帷寒乳燕歸來小簾紫  
玉雁慵梭瑟上塵金鈿羞帖鏡中春挂絲微染鴉黃淺  
收淚生憎粉汗勻寥寥雁字雲中度望望羊車去時路  
不須回首怨東風背面啼痕灑瑤柱

題畫

綠潤紅殷春似織  
梁家紈綺無消息  
百花香底醉遊蜂  
小院寒輕翠簾窄  
飛來青鳥柳枝柔  
戢羽憑風為食謀  
小物從來操毒螫  
未應一啄向饑喉

題方壺古木風湍圖

為潘真卿賦

畸人平生山水癖  
經行領略多奇蹟  
見圖何啻坐山樊  
悅目洗心看水石  
何物昂藏挺老株  
青蒼點綴忽成圖  
天風撇裂起毫素  
龍氣溟漲當交衢  
攣拳培塿森涼玉  
遠挹泓渟湛寒綠  
飛湍九折天外來  
萬壑瑤華灑空谷

猗惟應龍潛九淵靜者一志安林泉眼中偃蹇柱碧落  
絕似端倪窮化先畸人流玩有餘暇何意同心在林下  
老壺仙筆世罕儔半幅瀟湘玉無價山城鑒賞如雲屯  
寶子新作同璵璠因之毫墨感知已冷風卷送潘黃門

題關河秋晚圖

為曾子常賦

半生慣作江湖客畫裏青山似相識長憶江南綠樹秋  
千峰落照推行色傍水人家草屋深憑闌浩嘯豁冲襟  
南天漠漠鳥飛盡潮落空江龍夜吟漁舟隔岸紫浦溆

莎迳蒼茫入煙路桃花源出武陵溪山閣排風杪秋駐  
兩翁矍鑠巢許傳崇闕之北茅堂幽登登回顧蹇驢客  
撩亂瀑花天際流曾厓竦峭凌危棧絕似青城度盤礪  
瞿唐豔潏勢東奔鳥道緣雲接西坂掃門古老意安閒  
覲面雲叢跨石壇中田金碧開日觀天東一峯橫黛鬟  
野橋流水楓林赤去去迢迢抵沙磧山川今古行路難  
駕駿同途受驅策幻夢塵勞見畫圖却從空闊望寰區  
浮林俯仰紛萬有一息端倪歸化初曾君好古嘉竒蹟



圖史相親置東壁更覓更生和我歌青藜千古同輝赫

百鵲圖

威鳳高翔九千仞德輝不下無餘聞人間鳥雀勢如雲  
據地經天已成陳金苞誰復覩九章耳根啁哳聲相忘  
不如百鵲入圖畫俛啄飛鳴相頡頏空山老樹清溪曲  
渴飲膏泉食野粟巢成不用占吉方太歲何由在窮  
谷天河構架歲一來不雜囚飛盜啁材何年傾耳喜音  
至陳我六符瞻泰階

百鷺圖

連雲葭茨汀煙綠雪鳥飛來集溪曲林下幽棲飲啄清  
虞羅彈射何能逐青冥鍛翮非無志鷗鷺橫秋不厭欲  
自愧摩天翼南運猶堪刷羽隨鴻鵠夔龍班來校序  
振彼西雛戾清肅容儀燕舞美君臣我客翩翩雅幽淑  
絕無鷗鳥同棲啄活水魚肥山有栗白衣何啻百為羣  
一志相攜戀林麓寥天霞散霜月皎一舉冲霄豁心目  
祇應玄鶴共歸來高結雲巢傍梧竹

題倪雲林畫

為劉二紹賦

昔在松陵識幻霞仙風雅度玉無瑕  
泖湖秋水通吳會攜手同登星漢槎  
俱邀劒履侯王第玉饕珍鮭濁無味  
多情紫步袁使君館以高軒顏綠綺  
綠綺泠泠瓊作臺流蘇香拂碧霞杯  
題封烜赫壁間出珂佩琳琅天外來  
傾心放意塵臺古知我鴻濛事騫舉  
至今金骨尚塵累碧眼方瞳浪相許  
曉移綵鷁三高祠青絲蓴脆鱸魚肥  
雪花水鳥供異饌九醞時傾金屈卮  
軟羅蜀纈飄巾幘

翠斂初來蜀賓國醉呼蒲壁換黃庭遙見掉頭心不懌  
却從寶帶望九峯回橈蕩漾橫江龍袁使倚枕高士醉  
我獨披襟乘晚風過從小隱湖東曲繞逕蒼梧夾脩竹  
溪亭金碧帶斜陽一抹飛煙澹華屋青瑤盃薄犀筋輕  
紫鱗出釜炊黃精明珠屑粉如瑤液舌乳西施香骨清  
琅玕誌刻邾儀仲草聖來游陳蓋衆時同綠綺架閭君  
三珠樹底鸞蕭弄轉盼相攜二十年展圖如見雲林仙  
瓏璁苔石玉在璞偃蹇喬柯龍際天掣鰲長得侵雲幹

幾棄鸞翎入神觀當時筆底覲風雲此日人間竦竒玩  
東平寶愛如瑤琨以我知心徵舊言千秋交誼悵何釋  
遙託高情長嘯軒

贈地理鄭升遠

博望河源探水磧青囊孤首窮泉脈景純驗此類成書  
孚子因之相陰宅蓬萊形勢三山壯青海明堂相主客  
弱流襟帶鳳麟洲射的嵌空出其側中田黍珠為正穴  
三花結秀呈虛白傍臨君位餘可推堆堆回回人莫測

君臨仙士側臨人富有賢才裨至德寰中險曲定背向  
枯槁均凹下青黑犯之逆道戾天經醜類縱橫滿家國  
鄭君學古搜玄秘更擬游衍周南北山之西為帝堯歲  
周漢關陝環奇蹟不用聯綿惑九疑雙瞳湛湛君應識  
咸陽松楸隘蓁莽帶礪河山障區域就中祥雲蟄王氣  
聖德文言揆方策桀紂遺污死無後過指虛寢呵幽魄  
仁人死歸尚何顧七十二冢姦雄圻若從美惡責由來  
堯舜之子無瑕慝賢愚根本自二氣百爾慎此非祥覲

君子小人良有以孟子期之五世澤君行閱歷由內觀  
習坎技龍體全式孰肯心田符地靈天下自此民無阨  
我有清明方寸地中虛七穴相通直君還具眼得真蹤  
便許名高列仙籍

奉寄林鴻子羽

我客樵川方十日君亦入關尋寓室北橋青眼識同心  
古寺琴樽話稠密浮雲軒冕委敝屣四顧天壤窮傳匹  
酒酣長嘯吐虹霓磊砢填胸恍如失君下三山度劒津

我留杭邑未彌旬忽聞行李有蹉跌太息中道生緇磷  
長天茫茫白日曉一氣吹萬迴陽春樊籠豈得繫麟鳳  
即喜透網遺窮鱗太原冷氊蟄文掾書來羨爾無懷民  
冶遊縱飲足肆志冲抱灑灑凌秋旻我欲從之路遐阻  
歲暮褰裳畏零露明年花柳晉安春握手狂吟醉何處  
江海間關人物改往事囂虛難此數風雲遺夢去無蹤  
俯仰閒情亘終古離鸞別調寄瑤軫餘韻蒼涼繞閩楚  
何當把袂挹冷風刷羽南圖事騫舉



次韻臨川李進士衡元成見寄并求字

二首

早歲相知不相見，况聞清譽如郵傳。  
太平經濟蟄英芒，江海文章掣奔電。  
鄴侯家學富胸宇，世梗都無一毫胷。  
青年虎榜早題名，逆旅洪都嘗問絹。  
新詩慷慨慰林下，繭紙題封白於練。  
鍾王墨妙我何有，彷彿雲煙筆端見。  
倘歸少室掃蓬戶，拂拭心畫龍蛇展。  
眼中塵俗君所鄙，雲鶴遊天足揮遣。  
懷仙有意汗漫期，願托冷風一披卷。

其二

弱歲窺天管中見為儒鄙俚窮經傳一從落魄燕粵來  
自倚文芒扇流電南圖羽翮風暫息秋水襟期塵不冒  
謫仙許與神交意下筆幼婦矜黃絹多君逸思凌霄昊  
一峽文瀾寫飛練傾胸耿耿付閒寥吾道卑卑時隱見  
青冥九萬期簸蕩有翅垂天思一展不然拂袖去城闕  
長嘯空山百憂遣達人出處貴自然天壤閒雲任舒卷

太白問月圖

翰林失意辭金馬散漫雄文繼騷雅一種停杯問月情

自言舉世無知者盛時冠蓋隘神州豪爽已應無比儔  
填胸磊砢付杯酒嘯咤風雲江海秋畫圖睥睨寥天表  
問答深衷契冥杳當年心事竟誰同萬古茫茫海天小  
文章英誼八百年貌得玉樹臨風前月明亦有金樽酒  
此意千秋誰與傳

次韻臨川饒夔秀才見贈

法書不可見稽古看石刻孰與辨正鋒如沙以錐畫古  
人渾朴鄙澆漓俗眼不識隗囂碑授受心傳晉李衛二

王咄咄為深知法敗顏柳諸賢輩偽流八法承其次要  
皆彷彿得緒餘各自成家岐亦異近人聾瞽無師授高  
者唐刻鮮有同况敢毫芒希漢魏揮遣於人何所宗君  
今有學繼騷雅物鑑妍嗤孰云寡胡為蹂雜龍與蛇虎  
犬未聞能並駕窮源入道自有門逆順偏正歸評論千  
秋傳後法何在時名濫廁徒晨昏公孫劍器飛晴雪吐  
沓光芒亦人傑好籠長頸伺周迴勿與癡人談墨訣

無為天師為遠峯東堂作秋林僧舍求題

老壺畫史擅一代尺素寒芒掃飛黛吾甥幻筆得天機  
授受傳心貌形外遠公老禪清梵餘扶藜信步猶龍居  
談玄造詣無二致丘壑風雲同卷舒西原雪晴玉為質  
展拂瑤臺耀秋日飛光運肘古墨香點染溟漲龍鸞蔚  
須彌堂堂柱法身性海決滄川無垠秋林花雨淨如洗  
茅屋清泉簷蔔村儼然東隱章溪曲翠竹黃花瞭心目  
青天雲氣徹荒墟相對跼蹐小山綠堂中之人緇素流  
一點湛波千峯秋遙情空闊際無相栢渡隱隱凌滄洲

山川今古不盡興  
人境相忘表殊勝  
還師仙筆圖幻空  
蕩蕩虛空絕安柄

昱方畫贈遠峯遠峯求題

壺公學徒真幻工  
吾甥入室俞方從  
甥今主教俞方侍  
弟子妙筆師高風  
顥師起詣僧中雄  
俞方契誼相混融  
閒來揮灑起斑剥  
暝色鬱勃開鴻濛  
孤峯南峙表天柱  
一水東注環晴虹  
長林草屋倚怪石  
蒼蘚古澗生秋容  
陰風慘慄嘯魍虎  
雲氣下上隨飛龍  
老禪得此狀無色

位置丘壑僧堂中僧堂東隱白雪壁拂拭古意看題封  
鸞綾玉軸好神采對鏡情忘幻泡空空虛湛湛非影象  
此意貌得非凡庸因師更覓太古畫義聖無端一畫窮  
次韻余樵谷見寄求書之作

江波月色環古城榜歌悠悠思濯纓雙魚錦字過眼明  
書致樵谷通清名揆辭滔滔文翰精混龐正氣師天成  
謂余草聖如伯英一掃澆漓浮俗驚我自正鋒虛腕生  
雷奔電繞海沸騰恍如公孫渾脫舞赤幟翩翩漢歸楚

流光擲鐵啓迷悟川泳雲飛殆天助為君鈎格展毫素  
識者其誰儼聲譽神交眷眷遣呵護千里之親如目覩  
姑山肯枉笙鶴度贈子延年玄鹿脯

南豐縣丞章好德贈草書歌走筆次韻答之

司徒筆法連城價運腕光芒洞神化三春桑柘老飢蠶  
六合風雲驅戰馬正鋒屈鐵舒流霆右軍咄咄李衛驩  
虎卧龍跳迅騫翥遊絲飛帛潛充盈章君筮仕青霄上  
墨訣翩翩氣豪爽竭來投贈感相知鈎格傳心無背向



蘭亭貯匣古墨斑雲鶴悠悠天色寒鍾王在世止如此  
餘子紛紛空慨歎

次韻鄧子方真人見寄

南陽高士神仙氣家住雲林好山水才名當世李謫仙  
意義千秋魯連子一杯一曲紫玉簫冷風天外招松喬  
方瞳炯炯萬古浪迹蓬丘憩玄圃飄飄琴鶴度瑯林  
笑咤風雲生玉塵仙翁自是黃綺流威稜豪爽凌滄洲  
遺我織成雲錦段天機不許世人求

題畫

為張孺文作

壯遊汗漫成陳迹，綠水青山慣相識。  
老年展卷起遐思，魏闕江湖心歷歷。  
茆堂置虛六月寒，漁樵語話臨風湍。  
扁舟同是寄萍梗，天地浩蕩心胸寬。  
却從羅逕通幽谷，芳樹環林草為屋。  
碧波如練野橋橫，有客歸來抱貞獨。  
我昔華髮從神州，師彼子長為遠遊。  
河山形勢豁心目，浩素耿耿凌清秋。  
西風霜鬢不相待，良圖萼草人誰在。  
但見肉從髀裏生，那知容貌鏡中改。  
卜居泉石效隱淪。

始覺半生幾誤身只今畫裏見箕顙意外脫畧超紅塵  
悠然之軒有逸士讀書灌畦安所事冥搜或擬探草玄  
載酒時能問奇字山中雅致愜鄙懷沃洲可買移家來  
桃花春水武陵路絕似劉阮迷天台太平經濟付年少  
草澤期願我同調填胸磊砢不可留散漫高天劃長嘯  
高天指顧雲霞流悵望玉花連十洲他時蓬島邈佳勝  
更擬元龍百尺樓

次韻臨川洪韶九成有贈

平生肝膽國士風快意鵬鶚搏青空千秋氣義炳火日  
過眼浮華非所鍾五峯洪子美德容浩以炯炯窺管管  
竭來投翰東至公知子學問如麟龍有才棲棲甘養蒙  
唯感契誼當雲從勉脩天爵歸有道珂珮指日明光宮

觀禱即事

壁月流光玉臺露青瑤玳瑁三珠樹盤螭鏤篆騰紫霞  
雲母交窻引霏霧翠仙離離翠羽軒九章迭奏參差瑀  
寥天雲錦遏空碧時雨寶華歸望青玄黃太史三天史

清心肅神覲天帝祈民福壽考終命善人相延保世世  
香風灑灑聆至言靜定嘔吸成汞鉛萬山明月出滄海  
一片秋水涵長天矯首鴻濛禮無上八垓湛湛瞻虛曠  
轉頭金玉五枝燈一瞬回光燭無象

琴操

採薇操

彼腥腐為氤氲兮紛舉世而飴之曰趨風而委順兮悼  
冉冉而危之冀可免於萬一兮顧衷私而違之匪獨善

於斯須兮慨大義而歸之山之薇兮潔而肥之既得以  
療吾飢兮我則宜之

採芝操

嗟嗟皓天甘彼巖穴肆志游盤以茹芳潔深谷高陵光  
被日月非我羽翼豈我喉舌飄飄還山天下勇決邈矣  
唐虞保身明哲

八公操

猗歟青紫被體而微兮味以珍鮭充腸而肥兮吞啖腥

羶馨香則遺兮玩彼長物清明遂疲兮天錫公其來下  
兮吸光彩而騰雲螭披閭闔而過北斗兮俯塵世如淤  
泥示要道之不煩兮澹虛中而無為願相攜於玉京兮  
惟太清之是歸

歌

平園歌

帝之平園連崑丘仁麟祥鳳居其洲堯廷來儀瑞聖世  
魯狩反悼非時遊先王揖讓化成效天人感格臻嘉猷

非時為祥乃為咎不見哲人興古憂

聖人出

黃河清泰階平甘露降庭醴泉生布卿雲耀景星粵若  
稽古兆休禎天人合萬化并五常並脩見玉英天則瑞  
聖何徵元元延佇久屏營曰縱暴以亟盈休傾之否泰  
可迎肅後塵播先聲鳳凰覽德輝來庭囂歆息區宇  
寧聖人出仁風興

紫陽仙子歌



紫陽玉貌絕世華雲裾羽服擁丹霞翔鳳徘徊九霄上  
蟠龍步驟五雲車上元仙子同旌輦玉轡苔裳回南面  
青飀還邀紫府仙玄棊不逐崑崙宴嫫娥纖歌彈月箏  
雙成妙舞參差璫三十一枝風色勁秋空亂灑步虛聲  
不分錦衾留洛浦情知霞佩遺交甫一從鸞鶴去西華  
雲雨樓臺想南楚紫霞仙尉當青霄清心端簡聆回鑣  
賜以長生碧瑤笈仙經脈望蠹塵銷佩服仙經食脈望  
一雙青鳥遙相向別乘綵鳳導飛璫逍遙黍珠騰玉京

若之何歌

天地昏昏日月薄蝕泰山為陵河海流逆杞人忘憂林  
類乃賊宋人奇玉卞和寶石離婁掩察烏獲無力相逢  
衢路側欲進詎能前詰屈羊腸坂覆車繼後先保退涉  
逆流鹿豕為我緣冥冥障霧集陰風淒以旋饑渴猶可  
忍單裾濕不牽願得乘桴浮洪濤日滔天幽陰舞魍魎  
毒唇坐噓煙願得棲巖穴蛇虺肆蜿蜒惡草尚被藉瘡  
痍且蔓延西南有古莽不照日月明東北有阜落嘉苗

所不生天高邈難攀地厚載可勝由來雖怵惕既往亦  
徒行若之何兮憂內平母以為此傷中情禍有仇綏福  
有膺劇亂妻治實相經滄海桑田終變更理有極否泰  
符徵

### 西王母歌

雲和琴瑟飛瓊弄青鳥鸞緇曉通夢夜光珠綴九霞冠  
王母親傳密香送上元六山火玉佩綠金之笈丹景會  
辟非更出紫錦囊酒闌五鳳鮫綃隊俯觀流景念濁世

貴富浮榮等污穢紛拏外景織深衷蔽障靈光城郭敝  
促今成古烏兔走蟻壤營營不回首生生天元具大有  
飲澹除華幾人受東方暫之紫泥海歸遣明生拉陰宰  
揮呵雷霆用不難抱一還元致交泰重以千年女鹿脯  
碧桃杯寬納區宇清涼五內消陰滓一真同若超今古  
不惜真詮泄至道六甲靈飛確皇寶直從虛湛復本元  
歷劫吾當錫仙誥

新霽後望西山作

曉雲城闕霽宿雨氛埃淨東旭披素光西峯倒圓景山  
川庶物秀洪南仙迹奇標昔所探舞鳳三江週沔水奔  
龍九疊障靈巖靈巖芳潤生佳木梗楠如金杞梓玉楚  
材幽森挺楨榦楚俗熙和地饒沃繁花媚柳照江城兵  
後樓臺列將營玉勒曉風看騎氣金鉦夜月靜邊聲陳  
家待客空懸榻宋室求賢浪得名君山傑閣空中影並  
峙薇垣代藩屏三川紺緼春四時一片綠雲秋萬頃堂  
堂考鼓鏗鯨鯨鐘浦樹溪林衛幾重天道宏文垂麗日和

風膏雨渥恩濃水國之妖業蜃子劇來禍民干地紀都  
仙太史夙所隸天帝錫以長生璽玉淵飛刃馘潛妖鐵  
柱中流遏洪水下感遺黎樂道真至今江海淨無塵雲  
中雞犬通仙路畫裏牛羊識幻身壯遊跼蹐留吳越仙  
景參差殊未謁何意南來作楚囚新亭舉目白蘋洲鴻門  
玉碎羣雄散芒碭雲空王氣收此景此時傷偏側填胸  
磊砢紛如織孔聖因知北鄙竒謝公遂愛東山屐東山  
屐齒躡青雲時止時行道不羣為君一掬南溟水天下

蒼生滌垢氛

毛將軍古劍歌

炎精烈烈赤幟王手掣匣龍威四方澤中巨蟒迎刃斷  
玉碎鴻門并楚漢鋒霜濯濯不居功年深玉蝕紫苔封  
芝山名將應時起神物啓閔涵秋水純鈎太阿同冶歐  
卞家餘材琇蒼虬剗妖剗佞靖六國毫芒不動臙脂圻  
置之金鏤螭錦囊批鱗擲匣騰晶光平津望氣勞心力  
雷令於官竟何益爭如脫穎少年時今日高堂佩陸離

願俾將軍壽金鐵寰宇清澄似明月

還樸歌

為許從善賦

二儀莫位清濁判舒為萬有羅輝煥三才設造無纖竄  
兆形賦質枝緣幹以情矯偽物欲亂知覺既生渾龐散  
至士悼世不返汗示道析理回迷誕葆靈於體止流漫  
教出師成從侃侃上德佩服內凝浣下愚笑毀忽而慢  
倚歎許子夙昭貫懇懇求師走江漢立雪止闇夜達旦  
求已元元畫爻象用為風雲守成算斂藏韜神保和緩



八方軌則等浮幻掃掠痕瑕入神觀一真湛同復虛統  
柄斗于北當南看天人恢拓固無間還樸澄澄理彌粲  
與隱者陳洞陽論三教

我昔放白鹿天行杖青藜雄文烈焰照萬古勢局軒冕  
披雲霓皋夔無文不識字堯舜言傳心法是衰周季時  
民異心坦途蔚開柱下史乃有仙風鼓冥漠宏儒上智  
優不作西方大言理則同聖者以之捷徑中我乃從容  
即交萃因知三宗不在外調笑文章天地間流觀豪傑

風塵內亦有當世策恥陳封禪書時命若腐草光輝燭  
泥塗回視色身幻長物何纏縈一貫唯達道逆氣求長  
生爾來九萬歲得之無為天下寧瞭然區寓中蟻壤八  
極何營營鯤化之南有天池泉脈湛湛波淪漪自從一  
掬洗心眼飛光天門射紫微胸中培塿累萬億回風電  
掃了無迹崑崙西出樽桑東月出月落經天中鳴龍嘯  
虎風雲表仰高鑽堅入冥杳宏之芥子六合寬斂之穹  
壤一塵小亞聖三月不違仁西來直指心在身漆園實

得息起踵數子理見超凡倫要當脫略凌萬仞明如青空  
擊秋隼衆人萬語畢一言獨於默者領本原能方其體  
用其圓何不世外行觀天

敕勒歌

敕勒川環陰山種作穹廬觴酒弦彈牛羊萬計各有羣  
動有禮節情逾真土風渾龐德澤熙淳視民如已一體  
歸同仁地偏西北庶類殷中國聖域何能馴

王子喬

王子喬緱山笙鶴望亦勤分明舉手謝時人茂彼天子  
貴獨善愛一身嵩高山三十春道成飛馭玉臺津拉浮  
丘覲紫皇排閭闔凌昊蒼黍珠遊樂殊未央王子喬棄  
仁而不為身謀已多仙道誠樂矣嗟爾遺民顒望何

長相思

三首

長相思久離別此身雖遠情還徹一寸心千愁結羌笛  
怨邊秋離人倚樓月鯉書歸封斷雁錦迴文滅

其二

長相思久離別單于臺上伊州月玉帳寒金鉦徹三年  
故國人百里陰山雪暮雨塞塵黃哀笳隴雲咽

其三

長相思望歸難羅幃斷夢幾時還歌月枕掩雲鬟紅樓  
春尚淺翠被曉猶寒滴堦朝雨絕淚眼不曾乾

同熊經彭聿宋季陳介陳亨嘉陳景壽遊翠  
雲關得磻字

手策綠玉杖嶙峋涉天梯雲峰峙六合面面翠鬟低我

昔乘風陟武夷俯臨三十六曲之迴溪嵐花霧彩漾空  
碧摩蕩日月相交輝長松百尺大十圍怪石岬嶭虬龍  
飛空山無人風落木半夜月出青猿啼東平劉生劃長  
嘯手中龍泉電光繞三山鸞鶴不可留一片行雲入秋  
杪瑤軒逍遙君玉頰明珠紅笑指白石洞揮霍雙青  
龍為予歷陳華與嵩天台南來雁宕之高峯膏泉輸并  
注其下奔馬萬仞開鴻濛雲關雙穴天河通捲浪八極  
周崆峒乃聞異人演至義毘羅法門開不二二士從容

獨後來龍蛇翰墨雲花墜西來老翁追莫及石樓青虛  
壁鐵立照影空潭得月明掉頭歸去天風急念我三生  
主玉林天下名山諧夙心自聞躍馬泉中柱恨不一覩  
鏘璆琳屈指十年滄海變逍遙君登九華殿予亦騎龍  
擁翠鸞東歸麻姑尋紫壇長年青飢飯食實翠琅玕  
飛來紫霞凌羽翰竦身忽在青冥端一鼓剛風挾素  
月列峯照眼金斑斕白馬秀出雲林山爛銀查堆如彈  
丸卓筆之峯出其右手接南斗挹回轅攀蘿緣石坂汲

水松花礪笑殺鶴上人吹笙碧桃晚三時玉女吐蘭臭  
九門霹靂巨鼇吼陰崖風雨碧波涼潭底雷文赤蛟走  
脫我紫綺裘因之雙佩玦濯足巖下泉凌空掃瑤雪莫  
碎白玉斗且拂珊瑚枝山花與醉客何處不相宜請君  
看取天目之西陲蘄然枝傾天崿頽人靈八百萬不啻  
一土杯請君看取崑崙之北角萬斧昆吾不能斫巨靈  
一劈迹如削亂鬼衝風六時作一山一水直萬錢且復  
對此酣歌眠黃河九曲猶清濁泰山高高荆棘天致身



福地人中仙何用戚戚悲流年願從置酒三百斛一斛  
為君揮百篇

贈瞽師吳炯中

君不見文成將軍叶五聲京房易學窮三星管公器識  
薄何鄧蒼生已信誤寧馨我生半生江海上海圖星史  
多招訪十年歸濯三谷流思得異人歌遠遊五峯吳子  
好才氣遠來談天折經緯黃鐘律歷森玉衡紫微天元  
發金記生死之門三十六子盍居之迹仙躅帝恐泄道

隕厥身可憐雙瞳如滅燭文成京房非至人子今內養  
充陽神河海形勝瞭衷曲堯舜之主巢由賓小儒行藏  
安足云大聖厄宋窮蔡陳當時天地快一擲金盃米奪  
萬人勲功成治定潁川水尚友赤松攜列子垂天鍛雲  
冥漠間子能相從海上山若遇少年天日表高歌此曲  
豁心顏

烏生八九子

城上烏夜棲城頭樹城頭樹弱枝本輕棲飛不定啞啞

聲強承彭澤飯示靈方朔經火流王屋瑞幕集楚師傾  
一年乳雛將八九毳毛纔生剝黃口棲冠昔在曾氏先  
墮翼長驚羿弓後雛多巢轉狹風高葉早凋時啼御  
史府直填織女橋不學奔波覆車粟却歸空城身局促  
月明無枝猶有樹鷹隼飛來驚不去

隴頭水

山隆隆路疊重哀笳沈落月空吹裂悲風驚沙起隴雲  
陰陰覆隴水不是隴水聲辛酸千古萬古英雄流淚血

至今幽咽不曾乾

惻惻篇

問子何惻惻杯水吞舟苦崩迫仲尼一人在魯國刮眼  
剗精不之識後世乃有秦始皇操弧挾矢坐天堂先王  
禮樂成灰燼下愚黔首安可當上古之世鴻荒民中古  
熙和雜澆淳仲尼遑遑來相弔三月愁眉不得伸何況  
萬人掩坑穴足一蹴踏燕趙裂逸翮雲橫四海秋大旗  
風掃六國血魯連恥帝東蹈海李斯挾書西入秦上蔡

獵犬歎丞相望夷鹿馬惑國君沛中劉生好隆準烏合  
一舉當九門躡足附耳策雄略天張雲卷登乾元量能  
恢宏布大恩子孫王業四百年殘嬴豈無萬年計大寶  
猶多一再傳

獨漉篇

獨漉獨漉水濁見月水濁可澄心濁傷明泥深道苦挽  
行無侶非不獨行獨行多虎蒼蒼長松獵獵大風客有  
所懷如青天虹明明旭日橫天東出鵬羽鍛秋陽光若

失錦繡入火文章膏煤火滅成塵不異蒿灰驥發遲遲  
志在千里刀不斬仇孰以施利嵩嶽何高海水何深穹  
壤其極不如寸心

鰕鮒篇

戢戢鰕鮒如塵如毛自江達海逐浪乘濤終然假水力  
江海任逢遭揚鬚播鬣不盈分毫列隊排波得志滔滔  
乃復笑潛龍養志事天遯屈身濁水湄風雷走江皋魚  
目皆見哂鰕鮒軒軒勢相高欲見葉公葉公懼豫且制

我於兒曹鉛刀一割利誰復識昆刀猛虎落坑陷反愧  
當路葵時來無貴賤天地可能逃

行路難

四首

膝上青桐枝朱絲琅琅金作徽傾君三雅爵鼓我九奏  
冷風辭拂君蒼龍切玉之雄劍解我紫鳳承珠之寶犀  
繫取夸父西追之白日照以太乙夜光之青藜紅顏不  
留白日暮凡愚上智俱塵土衆人刼刼眼前榮黜婁取  
足身後名眼前身後知何用但見纍纍北邙塚

其二

染玉易改色中心宛然守故白何言玃玃傷踖踖素懷  
因今念疇昔拊劒以浩歌繁星朗朗當天河繁星豈無  
光不似明月何掉頭咄嗟心轆軻誰能聲折膺天譴還  
君白馬雙玉璧殫決河流良太息

其三

鐵網滿江海珊瑚網易求文犀一照水萬里將橫流君  
不見紂寶金玉棄善人死衣寶玉自焚身唐堯三尺土



階上八元八凱承華勲殘羸赫起六國吞魯連恥之去  
若雲沛上呂翁得佳婿平良以之心使臂入關但遣收  
圖書善人相延四百歲失人難得人易寶玉富國家何  
曾延萬世石崇金谷園財多葬無地誰能滅至寶善人  
行當起

其四

苗生萬穗千穗成野草無種日交榮藉令野草可食實  
田不耰鋤牛不耕東鄰有子業儒術仁義檢身動合律

衣不蔽體登年飢才恥周時世見欺不似西家出無賴  
十八行充當義師義師一旦遭驅逐身率醜惡橫路岐  
至今家富丁力壯自矜年少五男兒贏餘肯濟東鄰子  
書生財輕重羞恥明朝人去空茆茨行雲無方不可止  
問問傳笑何班班富貴豈同貧士顏草花苗實異根蒂  
苗當實時草自殷君看跼蹐負浮美何似仲尼陳蔡間  
遠如期

排闥闔遨紫清長風結佩霞引旌拉禦寇攜莊周觀化

八紘逍遙遊跨東海濯漭盤酌漿斗柄長闌干澆沆瀣  
和陰陽臂挽六龍駐三光翻雲笈閱寶書潛啓九籀窮  
天圖伏絳闕祈洪私請君遐齡民壽期弭患害登福嘉  
天下普洽國無譁帝憫誠聆昌言卿雲翔空當九門錫  
璫醴勞玉筵惠慶繁祉益壽年服宏德顧子民荅天忠  
君孝養親母自孽冒毒機生蹈五常死不違

陌上桑

清箏且徐徐聽我歌羅敷羅敷入豔里閭提籠采桑當

路隅使君停五馬顧問何溫如黃鸝自啼蝶自舞羅敷  
有夫君有婦此身肯學野鴛鴦豈得提籠自采桑妾家  
夫婿侍中郎黃金為門玉作堂腰間碧雪鵝肪佩耳畔  
翠雲魚鬣瑤人人矜妾佳夫婿雄才英英照天地生來  
一諾重千金人誇金張竊獨鄙夫才婦色兩恢諧各有  
節義臨身垂使妾家貧成獨處夢魂亦繞青陵臺君早  
去莫延佇君妻肯采桑亦有道邊樹道邊車騎眼中花  
何不迴顧向君家

上邪

榮公爵幽石卿寵厲氣感類從上下同體正以正觸邪  
邪以邪矯正污流引濁源曲木無端影申商高位弊國  
政李斯濫刑秦祚罄仁虐俱抱材道合必授柄衆楚咻  
齊君尚攸宜善善惡惡毀譽交譏冥會從心物自来根  
茲符契理不違君誠好樂下委隨善淫鏡鑒萬世規

吟

東武吟

弱穉讀古書十三知大義訓習粗可觀傾鄉值戎事十  
七從征戰隨軍謹溝壘自懼弛負勞不敢廢文史楚楚  
揮翰成措辭通性理十九客閩師顯邛四方使嘗挾金  
鏡策上窺唐虞際亟欲洗囂煩廓清掃氛翳既冠責成  
效侃侃牧庶類宏仁願亦溥志大竟垂惠圓方世齟齬  
德惡異倫擬鷹犬血爪牙鷩鷩則林避長饑信陶詠餘  
富徵黥謐匪曰恃末才儒先妻時棄風雲息胸宇澤濟  
韜涯涘聞道一何先未老心如醉貞情安晚節虛罔挹

仙氣向來滯形迹回顧析非是何歎失東隅桑榆良有  
遂

次韻許維翰見示龍虎山吟

三十年来總龍虎天闕地軸相騫踞就中真靈呵護神  
仙居玄圃閭風無間住陽平治隸青城山飛度此地成  
還丹溫溫鑪鼎崛起仙巖畔綿綿嗣系鬱羅班十有餘  
年猶龍宏教起累朝錫號侈爵四海崇高美至道忘  
忘湛一真至人無我為元始輔元翊運裨化工竅補混

金  
卷三  
池天玲瓏竒山射的峯巒似怪石鳳麟洲渚同鬼工絕  
巖呈巧構龍井古壑開幽宮以誠投之致應格有物往  
復施報無終窮塵湖琵琶接突兀雲林白馬拱衛當成  
功天上地下三十六一轆轤中幻海屋太和元化體同  
仁一氣相親自敦睦吾甥眉宇真天人帝錫玉笈金宮錄  
金宮錄集百祥臻五福臻五福公侯名爵位神仙不與  
憂患承天祿

麟角吟



歌我麟角吟傾君熊耳材堂中三千士一一笑顏開君  
不見蔡丞相曷鼻巨肩不可向躍馬食肉四十年富貴  
何曾有形狀又不見漢黠王輸作驪山為叛亡羣雄躡  
足定楚漢兔死鳥盡良弓藏人生貧賤多論議龍飛虎  
變知誰是伊尹從來五就湯魯連畢竟羞秦帝長城三  
萬里禍在蕭牆起碩儒無事向遭坑亭長何曾識文字  
天長地久今如此黃河清濁皆流水不見愁雲咽隴頭  
何限英雄眼中淚去亦不足惜來亦不足矜但願高標

迴白日春花秋月醉良朋黃金堆山嶽美酒為君酤北  
斗作酒杓東海作酒壺勸君飲君君莫辭風雲感會在  
須臾何乃局局悲榮枯當使功成拂衣去攜取西施遊  
五湖

元音遺響卷三

欽定四庫全書

元音遺響卷四

元 胡布 撰

行類

長劍行

男兒當作萬夫豪俯拾青紫如鴻毛時來擁篲橫區宇  
剖決浮雲凌九霄蘇秦昔時貧賤阨掉三寸舌相六國  
位高金多歸故鄉入門妻嫂皆下堂一家勢利尚如此  
路上行人誰家子丈夫恥作兒女悲燕雀焉知鴻鵠志

酒酣憤歌歌激烈雙眼窺天唾地裂便從東海批龍鱗  
更向南山探虎穴寧能寂寂雞鶩羣微與螻蟻爭紛紜  
金盤六博快一擲采取將相圖麒麟不然凌風事遠舉  
南招羨門拉松子汎覽清氣乘陰陽周流無極御八荒

君子行

奉寄玄瑋張先生

饑從猛虎食渴酌天池泉天池清且遠猛虎食恒鮮莫  
以松柏貞不樹桃與李莫以芻蕘賤鄙言不入耳慷慨  
求衣食直道偏荆杞有異春華榮不同秋霜死古之英

雄人豈得處疑似

滿歌行

蚤歲逢危迫長百罹從軍苦樂遐路險巖途窮涉遠  
海飢蛟毒鰐聲參差眇體寄波上驚憂百折殆不能奮  
飛中道混異流不為貧賤移原生拙貨殖陶子常苦飢  
陽山猛虎夾路啼參辰錯莫夜無期夜無期殷憂填胸  
誰當我知入山蹈海思懷自安獨善之事奚益於遺黎  
願見海清泰階平睿哲握機寰宇亨毀珠與玉寶善人

以致平成周道如砥直如矢萬方熙熙登春臺塊獨與  
天為徒共安畊鑿誠快哉

擬得牆欲高行

乾大包物地無疆海不擇流源深長廣庭倚力柱梁一  
醜百惡圓鑿枘方漢卿毀齒楚臣蹈江九重回明豈掄  
亡願君如天宏畢照擬日光

擬當事君行

處貴不矜下德由尊不及卑此直難同彼枉眾楚咻一

齊美惡但聞譽譏譽譏君見宜一誠俟事萬機樸忠信  
不欺

反當欲遊南山行

日月不同經山海且周移理亂相踰越萬世若通達文  
武帝天下獨夫見陵夷周公三吐哺天下相同歸大聖  
不獨斷衆人盡所私股肱信善善賢愚類不違各有王  
佐才趨向審所之

反當車已駕行

具薄酒冀敦厚情主賓合德絲管停聲起舞奉萬壽樂  
獻答千齡勿愧暫驩宴期念長合并

君子有所思行

嚴駕出燕冀引領東都門曾臺鱗雕甍繡柱擘飛軒八  
節考鐘鼓列筵鼎食尊歌舞徵齊趙粉黛不給繁泰安  
棄兵甲構艱十一存尚倚仁治久宗祀幸未湮匪直戒  
滿盈諒由觀化原豈惟堯舜治歷年遂不泯真儒可乏  
術橫天肆流奔衛翼藉康哲圖迴獨煩陳端念勞居逸



積思盡厥臣百職監繇隸宴安豈禍根迴天自有經興  
復歸本元將告衆多士服德以昭愆

江南行

吳姬白苧衫撥擢唱江南江花鬪繁錦江水漾新藍吳  
兒雙雙歌竹枝弄篙濺水不成泥風過楊花吹不起鴛  
鴦相間白鷗飛別有紅樓花的的鮫結綵囊信拋擲十  
二方釵隔畫簾鵲黃螺翠春無力小儂新挽北人頭壓  
鬢雲鸞吐月鈎別按中州去聲韻繁弦度曲和輕謳北

客過從經北里南船買賣來南市回頭不顧買笑金過  
眼何曾羨公子為君醉為若歌不為免絲依女蘿但願  
一彈還一笑見骨金鏤無用照

傷歌行

百川逝水絕還流夸父逐日不回頭秋風鴻雁春風燕  
河東織女西牽牛湘君見竹還見淚遠人歸來石當起  
汨羅濯德君可迴憂天未崩杞人死黃河奔流接太行  
終不難行道里長有窮之君雙斷臂難返九日駐顏光

神仙可憑藥可久不見秦皇并漢武

放歌行

宿雲流陰度城闕城頭烏啼城上月胡笳歇拍羌笛哀  
宮廬將軍淚成血匣劍星文光欲動羅帷青燈明復滅  
空將夢裏見先皇曾是軍中識英傑伊昔青冥奮鵬鶚  
騫飛百萬翔寥廓而今白眼泣麒麟啁啾烏雀追風塵  
風塵陰陰暗河縣經過行人問征戰還將漢北裂帛紅  
回向遼東帶書箭箭飛翎折鏃斷金馬死沙場春草深

不見征塵掩骸骨朝朝暮暮隴雲陰西當太白環荆楚  
北斬樓蘭叱降虜黃鬚鮮卑應夢來白面終童棄繻去  
可憐功業歸偏將道傍枕藉成丘壤九衢呵從何紛紜  
列屋珠貂不相讓別有南陽開甲第轉日回天擅經濟  
意氣由來縛虎雄縱橫烏事屠龍計屠龍縛虎技難憑  
續弦煎膠奇自矜自謂亞夫知劇孟過從易水問荆卿  
國難欲除恥欲雪督亢圖窮已不發將軍不惜將軍頭  
俠客空成汗漫遊

猛虎行

蒲稗傷禾黍潢潦汚道路渴吸潢潦水蒲稗行且茹食  
而充中復煦煦子既云可孰不豫謂我南山有弱蒲昔  
為展席潔可敷底春土腴石乃滋推枝布葉何離離願  
同子坐鬱棲裂葉饒根啖而嬉實我飢潔子綏謂如不  
可潔孰云美且都謂如不可潔孰云棄禮謨弱蒲可食  
子奚不憚誰不自憐謂我子識

煌煌京洛行

獨處傷鰥盛室妬妍位道無規飾過多怨魯連恥帝干  
金何顧豫讓不死伏橋有俟天下雲從夷齊竟去加冠  
于屨義所弗處荆卿攘袂燕得國士將軍授首謂死王  
事叔孫之起兩生毅然且聖且賢不昧我天極量恢恢  
遺風泰基市門苟留梅生長之皇業宏仁暢越八表我  
寧一枝無所感妙得主隳仇良足於留極人臣貴登神  
仙遊

牆上難為趨行

東方瞳矔星暫暫鵲飛門前梧樹集啓我荆扉視遙見  
遠人以晨征客從東西南北來息疲馬結綬拂長纓請  
客上堂出屈卮自言空村但鋪糜客辭別家年及期九  
州豺虎夾道啼豪賢在路不擇噬月黑水白汨深泥曠  
野無人居雨雪何霏霏狐兔在地走機羅空設施磨麕  
成羣飲人脂獸走啖不及遠道行人往往不能馳蒿萊  
蔽目生黃雀飛去暮未棲虎大見雀駭見雀去山樹雀  
遺弊虎皮虎視空睥睨白日禽獸爭馳突人羣呵禦至

日沒日沒復縱橫人各不保生路難行棘與荆何能遠  
游逐利名拂客面上塵爬搔蟻與蝨食我鋪糜居我山  
水窟飲泉力耕種山樊寥寥壽安逸客今憂思父與兄  
何不拔劍邀徒旅斫草驅狐兔彎弓月張抨豺虎黃雀  
磨麕不足數父母妻子得相見乃不此身隔異縣慙慙  
心意闕莫以此言淚如霰

孤兒行

兒無父母尚在家貧不自保身寄他鄉罹患害父母生



兒時貴兒貴是男屬當休明時親朋來盍簪陳禮羅酒  
漿衍衍譽言談長且八九尺仁厚豐令顏羣下若屏氣威  
容不可干父母樂安逸家事所擯斥百萬上留田買花  
度年日強奴事慈父利我所貨殖資財竟蕩盡兒大無  
家室父母貧又老咨嗟何所道父遠兒不歸良時委芳  
草豈無鄉里思人情多是非豈無鄉里人貌好心不知兒  
父天一隅寒溫莫候期道路日悠遠行人去且遲拔劍  
出門去恥作兒女啼四顧多悲風浮雲掠天飛熊羆號

前虎嘯後怒髮指天汗流頤兒命一何辜蒼蒼當為誰  
兒有寸心天若為憐時拜前驅暮後乘烏獲奔車魯陽  
駐景列仙縮地軒轅出令保合骨肉遺民全命稷契皋  
陶允平庶政大道無為民法不競下逮萬世休光猗盛

黃鵠行

黃鵠早寡哀思故雄無何怨尤義命允終君家有高樓  
雕楹繡柱錦盤龍綺羅疊裊褥金錯豔重重儂居茅蓋  
屋長夜卧如弓志尚不相謀寸心遂難同君家椎肥牛

飲醇酒歌鐘歷亂彈箏擊缶儂登北山采薇茹芝潔若  
冰雪強神注願自非口體人安事相追隨豈苟富貴慕  
豈易貧賤去所長泉下恥所短寰中苦大義不乖違死  
生誠何事儂是一婦人欲愧天下士

### 對酒行

我有一片心寥落萬古愁今晨對美酒浩蕩付東流我  
昔探穴求虎子西登芒碭候雲氣鼓刀之人理釣竿南  
山牛歌長夜起少年激烈負壯圖自當天下奇丈夫直

欲乘風破巨浪入海攫取驪龍珠英英湛盧劍玉琤青  
珊瑚久不得剗犀象斬狹猢猻星文繡澁霜花枯幽陰汚  
土豈足掩神王寶氣貫斗干天樞時來天地賭一擲握  
柄身先萬夫敵大人虎變非擬量肯為監子迴容色肆  
中虬髯生撫刃強調笑流目視河山餘子等末照一目  
飛龍人君先我同調豈無昂藏凌九霄以爾席卷歸包  
茅雙龍偃蹇不並駕鳳凰鵬鶚各有巢舉觴酣歌酌萬  
古悲風蕭條為我起九日不可迴青古人心事長已

矣長已矣不復來千秋一知己餘子將相才棄瓢老翁  
好襟懷寥寥乃見富春臺風雲圖畫出東海百代碌碌  
徒喧飀我御冷風振高節上追數子相超越鼓翼九萬  
登鴻蒙浩與大塊同噫咽拈囊元氣於卷舒橐籥六合  
天為徒

蹉跎行

朝亦恒苦飢暮亦恒苦飢山中好薇蕨猛虎向人啼我  
行茫茫安所之白日無光天昏翳陰風慘如西北起執

手河梁上我無舟楫子不得共濟還顧途路間塵沙被  
肌體牛奔同馬走毛冷縮如蝟道里在咫尺難行不可  
止三百六十日幾日如夢裏

相逢行

世路多岐曲岐曲達長安妍醜紛相逐輪蹄交其間去  
者不憚遠來人或悲酸榮辱理有常孰能籌萬端維昔  
尚聲勢捷徑所攀援事君本無誠功烈侈宏觀利祿及  
妻子奴隸肆餘驩孜孜徇一己僥倖涉國難尺長有大

展寸舌千憂煩陽揜陰為惡暴白詎可殫姦私深自恤  
汗簡乃欺謾矯首東都門歷歷銜怨訕脩天以要人未  
必淪異患物誠事不忤清源無濁瀾相逢岐曲人欲竟  
此長歎

鞠歌行

魚目哂明珠鰕鮒笑龍螭三獻何貽則足羞荆山萬玉  
為之泣仲尼大聖人削迹於魯衛蔡澤狀嵌枯詭譎致  
相位賈生不必恥絳灌漢廷羽翼藉園綺時命有同然

逸民猶任使盜跖之惡已橫天令終康裕登遐年顏回  
竟夭折亞聖何能冀自全化工無私循至理善善惡惡  
如流水達道貴自然梟獍非倫擬

艷歌行

杏梁初月上桂障晚香團並照花羞面聯芳氣拂蘭流  
鶯慚曲度舞燕比腰寬買笑千金易知音一顧難瑤琴  
聲乍轉嬌歌興已闌含笑俱傾意託語尚羞顏藕絲裙  
帶合竹葉酒杯殘的的帷中燭灼灼腕上環情如斷金



石恩有重丘山誠願垂燭光多幸保環圓

引類

鹽梅引

甘以酸為和味以鹹為主傷鹽喉哽咽過梅心悽楚調  
適貴得中心手天為度間髮不容私吹毛亦兼與神功  
佐四運翼德懋公輔璇璣典寬衡日月光合宇仁和扇  
惠風膏澤均時雨惟天子我心惟正儀我矩一夫曰飢  
寒由已使無所皋夔有玉燭永言佩斯語

雲龍引

芒碭秋空見羽毛  
龍光雲氣與天高  
五湖何處無明月  
斫竹南山坐釣鼇

思歸引

春行倦長路  
赫日逼隆暑  
肅殺每傷神  
嚴威雪交雨  
怫鬱念鄉邑  
剛風起郊墅  
衣錦夜行遊  
將何辨文縷  
非無逐日足  
豺狼正旁午  
欲假圖南翼  
鴟梟列行伍  
儼儼五雲表  
玉闕開金戶  
天黑不見人  
妖狐友虺虎  
饒以與惡

嚼遙目無逆覩延頸望所思龜山蔽東魯樊籠傷局促  
鈺筩嗟幽聚皎如萬璣琤信美在異土焚籠斬世網駕  
雲返吾宇

曲類

八塞曲

八塞常在先出戰常在前骨不委沙場貌不上凌煙死  
逐百戰塵生全萬死身不封李飛將餓殺真將軍鬼雄  
與人傑生死答君恩

出塞曲

被甲二十年全軀萬矢中腥風凌白刃人死我成功受  
降論百萬俘馘過西東寘顏石復刻烏丸壘亦空振武  
揚兵氣宣德暢皇風金鞭行擊節八面凱歌同天子臨  
軒陞剖符登美封簪花上林苑醉酒明光宮再拜奉萬  
年太平歌治隆所願全民命不敢計勲庸

懷仙曲

矯首寥天見黃鶴雲翎翩翩入青廓金泉百沸湧丹砂

九靈老人烹紫霞霓結旆旌星軫駕逸虛之宮五光夜  
待予鵠立玄黃中一激清風洗天下

磨刀曲

二首

恨不早有生目逆夷齊清恨不能丹青貌取魯連形持  
此恥天下誰為天下英

其二

莫作青銅鏡照面不照心常恐日月光覆盆難俯臨願  
君憑龍背直見海底深

大道曲

鳥鼠不足登鼎俎羅網不能致龍虎所以曠達人甘心  
託卑污乘田委吏豈足數聖人當之安所主潔世隕天  
全傷清非律度堯舜百代事規規有常程夷齊以義去  
後代死沽名伊尹三往來效者失其誠老聃伏柱史切  
切避虛聲子房全去就去就魯連輕欲食當思耕欲衣  
樹蠶桑逞舌畫雄畧假仁仁義亡鯤鵬鍛翮蔽三光鷦  
鷯深處一枝藏竹花結實鳳凰至卿雲五采明朝陽經

天緯地論賢聖王喬矯手畧不聽呼吸元氣御日月天  
地有窮道難盡卷者不復舒志尚焉可並萬世迭更變  
億兆各順令

烏棲曲

四首

宜城春酒鬱金黃樓上屠蘇百和香同心寶帶合歡結  
烏棲樹頭拜明月

其二

錦幔遙屏輝五采烏棲月出薰香謁此時氣息兩相憐



含嬌弄態不能前

其三

感郎言誓為郎憶魚為比目鳥比翼鳥啼月落東曙開  
俱飛魚鳥約重來

其四

疊股釵橫金鳳凰連環佩結玉鴛鴦啼鳥啞啞楚天曙  
金玉容華逐郎去

五言雜體



輕舉篇

弱齡秉清戒，齊心學上騰。羨門教服術，偃佺引拾瑀。鍊  
氣常通液，補腦急還精。歷紀校功滿，一舉得身輕。寶駕  
乘流電，珠履躡繁星。憑虛倚閭闔，闔肆遊寓紫京。木精友  
方朔，日華驗廣成。靈桃豔芝圃，瑤藥粲椒庭。樹剝玉文  
棗，枝懸金脊藤。黃眉覽六著，青瞳指五城。徒侶皆仙氣，  
服御盡長生。俯見泰山小，坐待黃河清。率土不足顧，六  
合豈難并。始異塵愚境，進卑世俗情。

古思

去年征小月今歲入雲中書去春鶯後夢歸秋鴈空  
瑤箏折繁柱翠被掩重籠裁衣猶想體臨粧羞照容  
妾豈懷私意君亮裏精忠但惜芳年邁未建列侯功  
君行當策勲妾行當預封

驄馬驅

十五學劒器偏騎生馬駒二十斬樓蘭輕身西射胡  
蛇弓彎月影烏陳布星圖響碧鳴珂玉生紅滴汗珠  
自矜

毫髮義寧憚萬金軀身當國難死名恥衆人俱必使清  
區寓垂勲竹帛書

槐

虛魄初凝始公位屢徵今兔目經時淺鼠耳訝春深炕  
枝承麗日斂柯條纂林曲曲朱闌靜葉葉綠雲陰首冬  
若服實長生諒可任

排難

烈士有名累不恥貧賤時聖哲畏匡宋蒙莊且授譏柰

何改故容猶得辨妍嗤達道乃自順異服尚云非豈伊  
賢聖姿抗力虎狼威而况當季世冉冉輕薄為矯首謝  
岐路斯文不在茲

公孫伏威隱居

北山移象設東壁耿奎光累葉曾題里高門表署鄉河  
山鍾地脈雲漢儼天章臺似嚴灘曲門當潁水陽紫霞  
虛亂棟翠蘚蝕飛梁石磴緣平陸煙樓接上方林泉韜  
紱冕經濟眷巖廊冠豈秦鴉歎歌猶楚鳳狂士矜才不

世天鑒德惟良

奉和鄭編脩本解難

二首

聖主中興日神功佐運年卿雲開華嶽王氣障幽燕望  
闕河山近瞻天日月懸九成來鳳鳥八表淨狼煙跋扈  
將軍死通明宰相賢可無慚漢節喜復戴堯天

其二

帝力歌垂拱民思樂治平百靈方效順萬寓欲銷兵衛  
翼金湯固陶甄玉燭明皇畿歸大統天眷及羣生九鼎

終神器三光體國衡寸心雲漢表決皆望宸京

慶壽堂詩

為鮑別駕德和賦

靈椿湛異卉華屋仰垂眉履仁敦孝友積善保耆頤鳩  
盤南極杖玉賜偃佺枝綵服八龍被秋花五桂時白光  
延素牖繁翠結瑤芝風生交玉佩塵起拂蘭衣十年不  
去亂百口幸無遺生全處泰道居安眷洪私化理神堯  
治山川箕頽違詎忘瞻穆穆予以樂怡怡

賞靜軒詩

為張廣文奎賦

幽棲安僻地泉石友芳襟倚景覽時秀虛局延賞音躡  
君游郭履眎彼北山岑水華籠月沼竹屋韻風琴葉落  
驚孤鶴花動起鳴禽論感潛夫癖瓢累許由心觸此後  
留憩俛世詎遺簪

友竹軒詩

為戴尚質作

遺簪二十載閒居眷朋儔感念負奇節虛心事交游廣  
庭風雨外青燈几案頭賴子相容與以遂慰清秋既此  
歎長夜復盼空樽愁將子共貞操永竟百年謀

同聶鏞茂宣王行止仲表養福能伯宴劉別  
駕勝彥清宅得青字

上客佳時集衡門綈騎停銕金披艷藻鳴玉振芳庭麟  
占歸有核鸞觴浮醪醺花明雜樹錦山翠鳳凰翎覽景  
念時聚薦芳惟德馨酣歌退落日緩帶倚春屏主奉以  
百年賓酬願千齡詎知今日懷明時在丹青

忽然有喜作

寄張叔亨

國仰朝廷大民瞻日月明百年均德澤萬歲樂昇平期



運彌天久輿圖倚地并消埃蜂蠆毒謬戾虎龍爭玉闕  
當宵旰金甌識姓名民多屠伯虐臣有智囊傾貢楚包  
茅入封齊錫爵榮東宮嚴事育北斗運璣衡將帥承新  
澤謳歌返舊京小臣無以報獻賦頌河清

陳迹

渡江清秋暮乘槎碧海通何意抱熏心方嗟委繫桐驚  
坐無陳子掃門還魏公目眩牂牁馬心折衡陽鴻客以  
棘任賤我惟天眷崇臣職守銅墨衆口蹇豪雄拔羽久

危鶴佐王非夢熊  
劍烏駢羅貴禘祫  
包茅空叨恩眷東  
候擊壤意南風  
雖同熠燿照尚想  
昔邪重

宿吳興玄妙觀

玄圃邀遐賞  
方外息塵機  
丹書寶真字  
陰洞紀靈辭  
脈望從經得  
玄鶴自天飛  
鳥下窺魚餌  
花落罨蛛絲  
流雲懸度影  
蕩水不成漪  
綵石綴珠露  
翠草偃金芝  
玩芳思寄迹  
逐異遽乖時  
吏隱懷梅福  
冲素緬安期  
欲結超然志  
方眷二儀私

同牛諒士良董在彥志王欽守敬莘野叔耕莫  
士安惟恭朱武仲桓徐賁以文何恒得常宿  
馬庸敬常舟中時禁酷次早偕九君子為馮  
信祖母執紼得逐字

懷宴喜留袂揭厲不成曲挾思麗霄漢緬竿想醺醪客  
留廣練被榻共侏儒宿環篆盤螭暖咽漏銅龍促坐披  
庾亮月佩韻元昆玉風靜餘春遠星發流雲逐嵐氣蕩  
鮮飈鏡水摩空綠舟停鷗許訝夜渴波還掬藻鏘瑤

豔列綺光華燭尚懷同驥附終以愧貂續

竹軒詩

為王簿欽賦

三迭伐經屢七賢游足夸樓似黃州見詩多衛武奢風  
裏琴聲韻月時秋氣華翠梁封蘚色玉榦蝕蘿花刻楠  
文初直代瓦火將斜來鳳猶鳴節掩狸終委沙

客至

長薄煙飛翠芳堞雨零珠跬步愁泥滑荒城况道紆歌  
裏來波艦架上亂風書所思驚夢想攜手尚擲揄嵇眼

將青共阮淚及漣如語盜猶懷已之闕詎委繻感義金  
非貴待價玉還沽有虎方如勇見龍當遂圖

夏侯敬業桃花別墅圖

嵌竇棲雲屋湍洄帶海潮危峰虛紫翠激礫墮琨瑤樹  
密潛通寺山深不見樵苔磯浮雨色藥筴引春苗碧藻  
刺波出蘋鯉透層跳綠蘿疑礙石樁木自成橋傲迹韜  
軒冕伊臣畏市朝繫船猶種柳飲水詎辭瓢幸此覺塵  
夢何言圖穀綃

發雲上

理棹環枝水依岸歷橫塘織翠將苔葉流曲度花航綺  
席餘香散澄湖明月光懷人將遂見望途猶恨長奔走  
知形累青紫與時忘養真非谷口讀賦感山陽鳴夷故  
宅遠麋鹿古臺荒去水芳年逝落葉暮山蒼詎自矜班  
志暫假似顏蘧

懷荆楚

南昌鐵柱觀西坂銅陵橋懷鄉望似見阻兵路竟遙不

孝疏親問負愧秩臣朝順褓猶方裏束帶自垂腰隋卿  
初賀雀秦冠徒歎鴉石媚愚將寶玉禍淚成邀文本知  
摧用武弁敢云貂雖懷銅柱援終返玉關超

### 結客少年場行

射獵陰山下經過狹邪口俱邀信陵客共酌新豐酒不  
韋膠漆契郭解死生友共念雪國讎漫睇蒙塵垢剪草  
除草根殺人恥人後所貴豪俠義不辭骨肉朽縱死秦  
王劍何負將軍首

自敘

艱時負弱操虛已盡天爵軌途將鑒往衆感紛非昨在  
昔任架構言念中櫟桷三千經名禮九方遡寥廓慕義  
披天日抽腸見葵藿膽氣識子龍風浪懷宗慤揮金去  
闕楚抱玉緬河洛局局前途隘紛紛後塵錯世衢春草  
豔物表秋雲薄孤情動故臣長策矜時藥抱熏自煎爇  
同汚遂支度敗垣竟可踰深坏亦幾鑿事農畦園靜望  
海雲霞漠蜜香知蜂起潮退綠魚落躑躅墮丹心齟齬



韜雄略素絲無色染散髮煩巾著尚疲東野馬欲展清  
秋鶚天德何酬許賤生當激作心遠冀宏圖時脩嚴重  
託迴復循至理非予獨謬

對鏡

壯氣愁邊減朱顏客裏凋帝京紅日遠親舍白雲銷裂  
土天猶廣長驅地匪遙三公殊玉節七葉愧金貂直是  
民思漢何曾犬吠堯識誣方士語旌返大夫招木石禽  
填海河梁鵲架橋鉤陳垂王氣熒惑隕星妖恢復應多

士民人諒久要竭忠文武畧裨益聖明朝

賦獨孤隱居詩

萬竹巢孤鳳雙潭據獨龍穴深留禹跡松古受秦封日  
月閒窻牖雷霆被劒鋒坐憑南郭几行策大宛筇首宿  
經秋嫩雕胡任水春金方丹券閱瑤笈彩雲重巾擲成  
橋度銀飛是雪溶魁罡繩步武天漢豁心胸令德高巢  
許名言振鼓鐘未緣酬夙契空欲躡遺蹤

海上有懷

五雲連海闊一水與天通日月三台近乾坤八表同遐  
荒歸震蕩草澤數英雄霸業矜文治天兵小武功麒麟  
當大路鵬鶚展秋空上將雲臺舊宗公玉節崇羣方連  
國難率土返王風血滿秦城下笳吟楚帳中敢忘將寸  
草不必歎孤蓬徙倚瞻霄漢龍光接岱嵩

殷憂

殷憂初假發觸語竟焦思尚鍛飛鸞翮遠企應龍期泥  
沙有雲雨指顧及崦嵫舉施心猶振畫地自矜奇投鞭

一水斷擊楫萬方齊燠燠推民牧元元司保釐毋讒去  
寸短毋變易長規眷謝舊典刑欲嚴新切治何言追綠  
兕終當磨白圭億萬天子壽永年弘緝熙

鶴沙道中

空林初見月老樹獨禁秋雁影望中沒鯨波天際流竹  
深僧寺靜逕古客亭幽去亂思劉表懷才念馬周豈無  
霄漢志不展稻粱謀潛澤猶多彥中興在列侯星河環  
北極蛇豕眷南疇去日馳芳景飛雲想巨艘短衣愁逐

虎長夜學歌牛收拾狂蹤去箕山累許由

懷八禮臺架閣

我為狂馳子負媿羈俯育方念遠家國凍衣饑食粟聞  
楚事偃蹇河洛行局促欲願自青海及留傷白屋異土  
居大朔浮名駭民俗鄙人尚潔操時議非同欲拂拭爨  
下桐溫存髀裏肉子拔屠伯困心遠羅鉗辱即地由矛  
盾合污避騁逐握手九山雲快意十里目葵藿類物性  
功名固邊幅夙昔分憂願嗟呵濟時祝一轉成蹭蹬半

生若顛覆我留迹龔勝子去追梅福去留無異理方順  
猶風褭竊效無君弔豈擬盡途哭悒悒我不如望望子  
來速萬彙仰日月羣生韞金玉肯惜匡世材為拯登年  
毒風雲快鵬鶚式遂歌鴻鵠

贈別戚景純

夙昔悵行邁淹阻及戈革共難九折路况寄千里迹雲  
龍渴心膽談笑致羽翼良時詎可要淑景何能即傾蓋  
晤顏采居蘭忽盈溢塵污或眼青齟齬彌心赤子未貧

負抱我固洞披識斯文拯淪溺餘子遂規則淳古有其  
人聖世終見獲天代閔神器人靈寶幽匿雖全蹈海恥  
幾晦潔身策子去此猶彼我傷家異國丈夫忠孝願鄉  
里生還客有道貴達無窮途慎憂惕多詩極忠愛溺志  
周反側莫以空言勞長負世儒迫贈子魚腸劍淬此霜  
花白計義感雷鳴雪恥委刃敵生當建名節既死雄血  
食勿以女兒情別淚灑胸臆

得二兄消息書示鄉人

弱弟知臣節諸兄戴母慈家猶隣戰伐國敢計安危異  
俗衣冠舊深恩將相知青絲調白馬赤手竊潢池力必  
先烏獲兵當後食其五雲封鸞鷟一老應熊羆上德精  
圖治仁師貴保遺山河崇衛翼日月望旌旗天道回經  
緯吾徒豈磷緇百年忠孝願三復脊令詩

恒山白龍潭寺題壁

行路苦煩隘暮歲方奔走来非梅福道去恥魯連後  
遑幾暇弔汲汲奚能就獨事陟幽遐披靈豁星斗乾文



迴炳蔚帝坐銷塵垢仁德允中興蜂蠆隨懸首沈憂家  
國願藉力英雄手心靜足忘疲道在形俱瘦恢宏諒有  
素葫蘆矜含秀豈是顧祭臨澄懷遣詩酒寒泉心膽徹  
漱石笙簧奏白龍霖雨資翠巘煙霞友不為洗囂頑終  
當避天吼

何鍊師碧雲詩

矯首青冥上飛神八極中蓬萊萬里外紫翠結鴻濛仙  
人雙鳳簫導鶴倚秋空散花將桂女捧藥見芝童要我

從太霞凝情碧雲裏遺以崑崙謠學食蓬蘽子冉冉六  
銖服燄燄五枝燈盤螭離火下裂鼎震雷升問道元無  
始大德不能名雲行青天上寓影以寄蹤有情在川澤  
豈擬當飛龍卷舒本自然茫昧信難測忽起必經天既  
行遂滅迹瀛洲如可待一鼓冲天翼母為相邀遮九萬  
當不息

題便面

近翠漂殘靄遙青出遠岑天光通野水雲氣亂秋陰貌

虎空林外龍蛇大澤深箕山無異夢魏闕有初心鳩玉  
方仙杖星徽擬舜琴不須彈別曲江漢少知音

章山人陰陽教授秩滿歸嘉禾

泠泠石峯水煜煜君山雲若人盤谷間高舉凌世氛出  
俾天地宰知與造化羣方儀表坤軸晷度法乾文寒暑  
無停機持滿俟毫分至理豁胸臆一試無遺論功成不  
枉已拂袖竟何言望望流水遠雲山靄孤鶩寄謝狂馳  
子長歌歸故園

奉寄江知司漢

弱節委虛名江海負羈勒  
叨友賢俊人春風幸披識晤  
言勞軫念謹論陳宏蹟  
豈謂隕良圖俯仰成今昔  
分飛況鱗次相視煩  
蓁棘梅尉終飄舉  
顏坏苟棲息共有家  
國懷俱渴雲龍迹拊膺  
九折路感義千金璧  
大聖畏匡人遲遲去  
魯國所願隆弘美  
致身保明德翻飛尚  
一鋟奮鼓垂天翼  
君若迅青雲我豈歌  
田石

邯鄲才人嫁為廝養卒婦

隱妾擅花容三千眷女紅寵遊名共輦被榮曾冠宮年  
將舊色改夢與故恩空一自經塵土百死念微躬破壁  
蛩吟夜枯樹鳥呼風貴榮少不逮賤辱老相從苟全父  
母體况慚婦寺忠

關山月

未久辭沙漠奉命討祁連後逐李飛將追躡至燕然疾  
風飄沙礫彫弓不控弦黃旗開虎翼綠玉匣龍淵地迥  
聞笳咽山空見月圓持比君心照白骨滿三邊

有所思篇

相思不可已相見邈難期當君懷鄉夜是妾夢歸時寶  
奩殘匣粉瑤瑟脆弦絲文杏酣嬌暈弱柳展愁眉綵屏  
香霧掩綺帳曉寒低照骨環金析見膽鏡塵飛苦為芳  
年去坐恐故心衰裂帛待秋雁掩淚聽朝雞亭亭將影  
弔脈脈寄心知香裏愁還熾想中人似來裁詩織錦去  
憶箭帶書歸望極將情遠途遙念馬遲素懷鍾契愛良  
願豈乖違一札緣風至萬里幸星馳

芳樹篇

碧樹臨秋風芳枝對華露寂寂憂思人冉冉徒行步青  
春去不來白日朝成暮坐恐雙輪車行摧九折路焦螟  
陰井歇熠燿踈簾度語夢暫留驩懷情恍如遇新人容  
自新故人心尚故勿以疲馬憂當計亡羊慮萬山皆北  
拱一水猶東注愁結楚天雲淚涕湘江雨

臨高臺篇

臨高臺翼翼何軒軒所思乃各天一方終日騁望不能

還天長水且闊兩臂無翅翎安得騫飛霄漢間臺高  
百尺臺下有水清而寒遊魚躍其中仰首見飛鳶上下  
亦可察山海亦可移愚夫一寸心萬智不逆知對面尚  
難同望想何由期臺高水深望不極望極徒令長太息  
里之鄭氏子業醫于陳求詩美之

神農嘗百草疲癯尉以興岐黃道砭法賢哲代相承和  
出保周民越人資內經倉公極炎漢晉謚術天成隋楊  
業太素祝由法交并至哉孫思邈剖析驗符徵縱橫分



寸間俞經從井榮理訣  
本王氏指落起沈冥六部悉百骸  
四節委七情真筌世不乏掇拾師  
唐冰顧彼女蘿託何傷蔓葛尋落  
薜榮終夕客烏倦還林雄才智助  
德澤世尚為霖危遜有明訓夷逸  
豈恒任

東謝江漢枉駕山中

蕪葭植弱節玉樹引芳柯  
謬有攀高望深慚接武多千  
山迎騎氣一水淨鷗波  
珠履青雲士金聲白雪歌  
貴無嫌菲薄貧肯厭經過  
但恐凌霄漢何因掃薜蘿

愛妾換馬

私恩徒累志國難或危身方缺閨中念將收塞上勲  
千金猶市骨一笑豈回春不矜蛾比月願得騎乘雲寶劍  
銷羈絡雕鞍飾鏤銀壯夫要汗血少女拂啼痕誰云惜  
窈窕當取畫麒麟

陳山人隱居

曠俗遺軒冕誅茆結薜蘿天心片月出雲際萬山多羽  
蓋緇林葉芳茵被逕莎空瓢留玉澗老樹泛星河道在

身俱重時非迹豈謫猗蘭當擬操藪桂有招歌射日弓  
間弩屠龍劍不磨風飡猶煮石雨種或披蓑何意攜紅  
拂無心跨白驪蓬萊今咫尺桑海事如何

陪莊沈二隱君宴城東黃氏樓

蒼山凌曉靄綠水淨波瀾樓出孤城外天臨四野寬  
瑤筵開勝地玉酒奠仙壇笛曲穿雲弄箏歌對月彈  
隱侯熊耳爵傲吏虎皮冠蓋世推才氣橫秋擅羽翰  
自緣無谷應非欲久泥蟠憂漢多時策歸周但釣竿  
簪纓今日

會圖像異時看共作山公醉樽空興未闌

胡永年兄弟石莊二隱卷

吾宗帝舜胄歛紹陳胡公百葉被奕世千齡暢皇風麟  
趾肅家廟鸞虬偉才雄璠璣相炳煥岸宇凌煙虹葳蕤  
吐綺采彞鼎光軒墉諸生啓春秋天下歌中庸曰余悚  
負荷越迹台垣中弱冠忝民牧十年歷兵戎塵裂匣中  
劍弦清膝上桐意闊時不偶心摧道非窮徒揮萬金產  
豈累六尺躬步影明月裏浪懷秋天空以此傲物表長

歌翼南鴻伯兄冠羣才鶚薦厠鄰封綜理局卑鄙遺民  
樂時雍文江水如練一勺此心同仲氏職行人公府步  
顯顯宣化廓清宇流誠達深衷累挹紫薇露時乘白鼻  
驄俱懷柱史隱共恥魯連功英英石莊雲歷歷山潭龍  
既舒彌宇宙欲卷絕冥濛出處象日月翹騫如岱嵩黃  
鶴在玉芝青山夾蒼松願助金石年分光荆棣藪若魏  
兩應起保漢二疏終

與姚東之言懷作

志士仰天庭終身恥居卑空名提向楚獨善竟何施伊  
昔裂冠裳白日慘簷帷高臺舞突獸烈火出絳旗櫓槍  
掃六國廷闕高五噫志士束名義思全中顧私北海節  
旄盡西風霜鬢吹心計周宣起眼穿漢武時終假扶搖  
力來臨天日姿機緣萬一間喬齡深本支回龍闡故業  
捫蝨網皇維螫手當斷腕微服偶違譏拂袖向滄浪扁  
舟侶鷗夷君誠東山客豈慰蒼生思挾此虎龍氣因迹  
雲泥機九萬有迅程波瀾浩天池如何一杯水遂活枯

魚為終當匡濟任俱負鼎鉞持敢竭駕駘材共宏霄漢  
儀成功蹈海去恥貶壁與珪天壤倘攜手君應哦此詩

黃鳥

黃鳥西窗樹低枝拂短簷曉帷驚楚夢春恨隔湘簾篆  
碧殘香印愁紅薄鏡奩遠期龜未兆近信鵲能占酒淺  
金浮彩筆清玉弄尖芳心待明月留意語纖纖

山莊休沐懷鄭桓居貞

桓別十年僅得一詩見寄

微月出遙嶺南山生夕陰石林通玉磴風閣韻瑤琴八

表縱游目四溟曠冲襟方垂簪組累忽悵別離深慨舊  
緬遐想披新迂遠尋雁分踰十歲鴻未得孤吟子戀蒙  
山隱余懷潁水心千金保樗櫟萬古繼徽音因之固膠  
漆何以貺璆琳

送桂子山鄒縣省親

江東又送客鄒魯去寧親別席花盈酒征衣露浣塵秋  
中淮海路畫裏嶧山人嚴父忠為令諸昆孝法民賢邦  
推雅治亂世得儒臣衣錦斑衣後鄉閭拭目頻



題畫送廉希魯

鯨波遙際海龍幹直擎天石隱連城玉淵澄澤物泉翠  
竿仙子釣桂檝孝廉船氣合神彌曠言深理造玄風雲  
徒入夢屠釣不妨賢杳杳迷形役冥冥逮歲年青萍光  
彩動紫氣斗牛連握手論心後誰先祖遯鞭

答楊茂建秀才二十韻

道喪真儒病詩亡政化隳斯文天汨沒大雅日陵夷應  
絕金鐘委聲亡月岳宜理音誰間作華采世優為古學

非文字名言析本支語雖遺汗簡惠欲驗敷施子服先  
賢訓吾遵列聖規才難俱皓首業癖友黃眉開濟寧無  
術風雲自有期未淹朱墨鄙且分草茅私白眼嵇康共  
清心鮑叔知情窺滄海淺志局泰山卑惜別分神劍懷  
歸咏紫芝萼鱸今夜夢猿鶴故山悲善養清明氣彌堅  
鐵石姿用須鏗爾作舍豈浩然移任道恒先已當仁敢  
讓師麟方哀魯狩鳳祇見堯墀上德符三曜亨衢展九  
廔扶顛良有願試誦別離辭

歸隱圖

為張叔夏作

舟楫江湖遠雲霞島嶼平  
遙天蕪水淨遲日帶霜明  
草澤人誰在林泉計已成  
問津逢季路蹈海識田橫  
去斂千秋氣來矜萬古情  
風雲徒入夢屠釣不嫌名  
望氣知埋劒臨流想濯纓  
明珠雖萬斛魁壁重連城  
書得圮橋秘門如谷口清  
卧龍終一起嘯灑為蒼生

賦得春日閒居言志

穹楣朝日澹邃閣曉寒新  
羅薄承熏淺香飄入幌頻  
閒

情關淑景雅致屬芳辰植園平達道濯水遠通津柳深  
鶯度曲花重蝶迷春琪樹羅金塢瓊樓照玉人雨山開  
黛鬣風沼蹙波鱗九野均天澤遺黎樂道真遜言居悔  
吝治世挾經綸虎變寧無待龍蟄豈終淪詎言因玩物  
嗒爾忘歸仁

鵲鵲

夷礪石礪礪陽坡草離離取適飲啄情養成山澤姿樊  
籠事格鬪脆翮互差池王風有深喻貧士無完衣物理

賦自然奔奔竟何為

奉寄全禪師

高僧愜勝槩卓錫憩三華梵唄下天樂香雲將雨花萬  
法匯一源衆流息紛拏方知湛淵默足以絕世譁止水  
鑒空影飄風散流霞風聞契圓悟方便演三車勉旃各  
遊養願得近袈裟

即事

溪堂霽靄散巖樹雲光落白鳥度曾巒青煙起長薄采

芝逢逸叟隱几比東郭勗此山澤癯西笑長安樂雲泥  
分靜躁隱顯世叅錯異曲既無能壽榘斯有託

企雲樓


為黃伯孚作

慈親竭孝養令子企雲思溫清豈不懷征徭敢後期斑  
衣惟間隙愛日每舒遲引領睇白衣恍如在庭聞傳之  
尺素圖啓彼孝慈詩予以著令典永言敦民彞

次韻追和李仲公先生詩

文以化為工俗儒局成法紛彼負疣贅芥蒂強扳扳負

芒竟誰刺代痛幾自搗珠玉既沈淵虎兇空出柙以茲  
迹元化渾渾綿翕哈蕪穢闢畬畝望穫有畚插揆才擴  
聞識舉乙必繼甲牲血久在槃俟與奇材軟



元音遺響卷四